

Powšitkowne WOZJEWJENJA

njedźelu, 28. oktobra 2018

Přiležnosć k swjatej spowědži w Róžeńće

póndźelu, 29. oktobra 17.00 – 18.00 hodź.	farar M. Anders, farar G. Warnar, farar D. Dzikiewicz, farar J. Magiera
wutoru, 30. oktobra 18.30 – 19.30 hodź.	farar M. Anders, farar D. Dzikiewicz, farar M. Kleiner, farar S. Foelz

TCM „Łužica pomha“ – Pomocna akcija za Pólsku a Ukrainu

Towarstwo Cyrila a Metoda z.t. (TCM) chce lětsa ze swojej akciju „Łužica pomha“ znowa dom za samostejace žony z dźěćimi w Elku w sewjerneje Pólskej podpěrać. Tam wjesela so nade wšěm, štož w swójbje trjebaš. Direktor Carity Elkskeho biskopstwa, farar dr. Dariusz Kruczyński, rjekny, zo su z tym potajkim drasta, črije, hygieniske artikle a kosmetika za žony a dźěći měnjene, ale tež płokanski próšk, kuchinske graty, pampersy za dźěći runje tak kaž za dorosćenych. Wotedać móža so pakćiki nimo štwórtka, 1. nowembra, wot póndžele, 29. oktobra, do pjatka, 2. nowembra, wot 16 do 18 hodź., sobotu, 3. nowembra, pak wot 9 do 12 hodź. w Zejicach pola Špitankec, Kamjenska dróha 10. Nimo toho chce TCM pólskeho duchowneho Paweła Staniaszeka, přecela fararja dr. Kruczyńskeho, w jeho skutkowanju za dźěći a młodžinu w ukrainskim měšće Perwomajsk z pjenježnym darom podpěrać. Tutón młody duchowny skutkuje tam kaž Don Bosco. Stara so wo dźěći, kotrež su na dróze žiwi abo kotrež pochadzeja ze socialnje slabych swójbow. Kóždy sobotu skići jim tak mjenowanu sobotnišu šulu. To woznamjenja, zo móža dźěći tam pisać a čitać, ale wosebje tež čłowječu zhromadnosć nazhonjeć. Farar Staniaszek pochadza z Elkskeje diecezy, skutkuje pak hižo wot swojeje měšniskeje swjecizny 2013 jako duchowny w Ukrainje. Farar dr. Kruczyński je sobustaw TCM.

Pjenježne dary za wudržowanje sobotnišeje šule a trěbne wobnowjenje jeje rumnosćow, za kotrež wustaji TCM darowansku kwitowanku, móža so tohorunja pola Špitankec, dale w Budyskej redakciji Katolskeho Posoła, pola Moniki Kraloweje w Boranecach abo Rafaela Ledźborja w Ralbicach wotedać abo na konto towarstwa přepokazać: Cyrill-Methodius-Verein e.V., IBAN DE 65 750 90 300 000 828 23 66, hesło: „Ukraina“.

Poswjećenje Hronowskich pomnikow

Swjatočne poswjećenje pomnikow blisko Kamjeneje, kotrež na zhubjenu wjes Hronow dopominaja, budže srjedu, 31. oktobra, w 14 hodź. Nyšpor zahaji so pola Haja při wopomnjenskimaj kamjenjomaj při pućowanskej šćežce, kotraž wjedže z Kamjeneje do Chrósty. Parkowanje awtow je při hłownej dróze zwonka Kamjeneje móžne, tež na pućowanskej šćežce samej abo před Hajom. Zahajenju přizamkne so procesion k třecemu a štwórtemu pomnikej, kotrež stejitej při hłownej dróze z Kamjeneje do Wulkeje Dubrawy, kaž tež w tam bliskim lěsku na małej hórce. Chór Meja poswjećenski nyšpor wobrubu. Wšitcy zbliska a zдалoka su wutrobnje přeprošeni.

Dojědźće sej na měrowy swjedžen do Wostrowca!

Wšitcy serbscy młodostni runje tak kaž druzy zajimcy su sobotu, 3. nowembra, wječor znowa na měrowy swjedžen do Wostrowca přeprošeni. Wón je reakcija na tam předwidžane wospjetne zetkanje neonacijow pod hesłom „Schild und Schwert“.

Wotjězd do Wostrowca je z Budyšina a Chrósćic w 16 hodź. planowany a nawrót wokoło 22 hodź. Po ličbje přizjewjenjow zasadzi so bus.

Pisany program ze serbskim podžělom so we Wostrowcu we 18 hodź. zahaji. Tež wjacerečny měrowy pačer budu so tam modlić. – Kóždy z nas móže być měrowy prócowar, kotryž ze swojim skutkowanjom k měrej a dobrej zhromadnosći w towaršnosći přinošuje. Tohodla budu tam tohorunja někotre wosoby rěčeć a wo swojich nazhonjenjach a prócowanju měř zachować rozprawjeć.

Tute zarjadowanje je zhromadny poskitk socialneho teama Rěčneho centruma WITAJ a dekanatneho dušepastyrstwa we Worklecach. Přizjewić móžeja so wšitcy zajimcy hač do štwórtka, 1. nowembra, w Budyšinje pod marija.koklina@witaj.domowina.de, telefonowe čisło (0 15 20) 7 27 38 06, abo we Worklecach pod worklecy-kise@gmx.de, telefonowe čisło (0 15 20) 4 81 35 98.

Diana Pawlikowa

Žarowanski kruh

Regina Krawcowa ze Smječkec a Tomaš Pěčka ze Sernjan poskićitaj přeni serbski žarowanski kruh. Wonaj staj kurs na žarowanskeho přewodźerja absolwowałoj.

Štwórtk, 8. nowembra, chcetaj zhromadnje z dr. Ludmilu Lajderowej z Drježdžan přeni tajki serbski kruh wutworić. Předwidžane je, zo so tutón hač klětu do jutrow wosom króc w Chrósćanskej putniskej hospodže zetka.

Poswjećenje wopomnjenskeho kamjenja

Při pomniku swjateju Cyrila a Metoda njedaloko Smochćic ma so sobotu, 10. nowembra, w 14 hodź. wopomnjenski kamjeń ze štyrjomi taflemi poswječić. W serbskej, němskej, jendźelskej a hebrejskej rěči wopisuje so na nich podawk, kak su nacionalsocialisća kolonu židowskich žonow ze Słoneje Boršće na Smochćicy do Miłkec ćěrili. Jedna z nich je w tym zwisku žiwjenje přisadžiła. Poswjećenskemu nysporej přizamknje so swačina w Domje biskopa Bena w Smochćicach.

Prěnjowoprawjenske džěći přeprošene

Dekanatne dušepastyrstwo přeprošuje wšitke džěći, kotrež so na přenje swjate woprawjenje přihotuja, na zhromadny džen pod hesłom „Cool kadla – fecich holca“ srjedu, 21. nowembra, wot 9 do 15 hodź. do Njebjelčic. Započatk je z Božej mšu w cyrkwi. Zajimcy njech so prošu hač do pónđzele, 12. nowembra, pod telefonowym čislom (03 57 96) 8 87 07 abo z mailku worklecy-kise@gmx.de we Worklecach přizjewja. Za wudawki dnja zběra so wot kóždého wobdźělnika přinošk we wysokosći štyrjoch eurow.

Praski chór spěwa w Róžeńće a Ralbicach

Cyrkwinski chór Cantus amici z Prahi wuhotuje sobotu, 17. nowembra, we 18.30 hodź. koncert w Róžeńčanskej swjatnicy. Mjez druhim zaklinčitej Antona Brucknerowe „Locus iste“ a „Ave Maria“. Wumělski nawod změje Lukáš Dobrodinský, na pišćelach zahraje Ondřej Valenta. Nazajtra njeđzelu, 18. nowembra, wobrubu Praski chór Božu mšu we 8.30 hodź. w Ralbicach.

Pytaja noweho nawodu Domu biskopa Bena

Drježdžansko-Mišnjanske biskopstwo je městno nawody Smochčanskeho Domu biskopa Bena wupisało. Wone ma so klětu 1. apryla wobsadzić. Wobšěrne wupisanje je pod www.posol.de wozjewjene.